

Statüts

Egualitad dals genders

Las denominaziuns da personas velan per tuots duos genders.

I. Böt e domicil

Art. 01 L' «Uniun Rumantscha Rezia Bassa» ho il böt da mantgnair e cultiver la lingua e la cultura rumauntscha, spezielmaing il chaunt rumauntsch tradiziunel. El reunescha ils Rumauntschs da la Svizra orientela e promouva tuot que chi serva a las tendenzas illa Rumantschia e giò la bassa; in prüma lingia però illa regiun da la Svizra orientela.

El vuol spezielmaing approfondir la cugnuschentscha da la lingua e la cultura rumauntscha da sieus commembers, sustgnair las lavuors da la Lia Rumauntscha e d'otras uniuns cul listess böt scu eir lavurer a favur dal rumauntsch in ün ambiaint tudas-ch.

Art. 02 E'l Uniun Rumantscha Rezia Bassa giodan tuot ils idioms rumauntschs ils listess drets ed eguela consideraziun.

Art. 03 In dumandas politicas e confessiunelas es la Uniun Rumantscha Rezia Bassa absolutamaing neutrela.

Art. 04 Sieu lö da domicil es a Sargans, sieu intschess es la Svizra orientela.

II. Commembers e lur responsabiltad finanzia

Art. 05 Mincha Rumauntsch ed amih dal rumauntsch po dvanter commember. Ils commembers nu stöglian garantir in üngüna maniera cun lur faculted privata. L' Uniun Rumantscha Rezia Bassa garantescha unicamaing cun sia faculted d'affer.

Art. 06 Concernent entredgias e sortidas, recepziun ed exclusiun da commembers velan ils artichels respectivs dal cudesch civil svizzer.

III. Organs

Art. 07 Ils organs dall'Uniun Rumantscha Rezia Bassa sun:

- la radunanza dals commembers (radunanza generela)
- la suprastanza
- ils revisuors da quint

A. La radunanza generela

Art. 08 La radunanza generela ordinaria vain convocheda da la suprastanza il prüm quartal da l'an. La suprastanza u ün tschinchevel dals commembers po propuoner üna radunanza extraordinaria. La radunanza generela vain convocheda cun ün invid persunel als commembers.

Art. 09 La radunanza generela tscherna il president, quatter oters commembers da la suprastanza e duos revisuors da quint e deliberescha tractandas preschantedas ad ella da la suprastanza. Tractandas d'importanza secundara paun gnir deliberedas sainza gnir avisedas ouravaunt. Sur da la deliberaziun definitiva d'üna tractanda na previsa decida la radunanza generela.

Art. 10 Üna vouta l'an organisescha l'Uniun Rumantscha Rezia Bassa rumauntsch üna saireda rumauntscha. La suprastanza ed eventuelmaing subcumischiuns faun ils preparativs necessaris.

B. La suprastanza

Art. 11 La suprastanza as cumpuona da tschun commembers (president, actuar, chaschier e dus consuprastants) e's constituescha svessa. Las personas elettas dessan scha pussibel deriver da territoris da differentis idioms. Üna perioda d'uffizi düra trais ans e glivra definitivmaing zieva quatter elecziuns.

Art. 12 La suprastanza rapreschainta l'Uniun Rumantscha Rezia Bassa, maina sias fatschendas, prepara las tractandas per la radunanza generela e pissera per tuot que chi serva a sieu scopo. Ella es cumpetenta d'impuoner incumbenzas specielas a singuls commembers ed a cumischiuns elettas dad ella.

C. Ils revisuors da quint

Art. 13 Ils revisuors da quint examineschan il quint annuel scu eir l'administraziun da las finanzas e rapportan da lur lavur a la radunanza generela.

D. Cumischiuns specielas

Art. 14 Las subcumischiuns specielas exegueschan las incumbenzas surdedas ad ellas da la suprastanza:

- dirigent dal cor masdo rumauntsch
- pagina d'internet
- preparaziuns per festas
- relaziuns cun las medias
- e.u.i.

IV. Finanzas

Art. 15 Ils mezs finanziaels derivan:

- da las contribuziuns annuelas dals commembers
- da legats e contribuziuns voluntaras
- d'entredgias d'arrandschamaints speciels (cor masdo rumauntsch)

La contribuziun annuela dals commembers vain fixeda minch'an da la radunanza generela. Giuvenils fin 20 ans nu pejan üngüna contribuziun, ils ulteriurs commembers pejan sainza excepziun l'intera contribuziun annuela.

Art. 16 L'an da gestiun düra adüna fin als 31 december.

Art. 17 La suprastanza es cumpetenta da decreter expensas da fin 3'000 frs. l'an.

V. Commembers d'onur

Art. 18 La radunanza generela po eleger scu commembers d'onur a commembers chi'd haun prasto fich buna lavur per l'Uniun Rumantscha Rezia Bassa düraunt 20 ans.

VI. Revisiun dals statüts

Art. 19 Duos terzs dals commembers preschaints paun decider sur d'üna revisiun dals statüts.

VII. Schoglimaint dall'Uniun Rumantscha Rezia Bassa

Art. 20 Per schoglier l' Uniun Rumantscha Rezia Bassa es necessari l'acconsentimaint da duos terzs da tuot ils commembers.

Art. 21 Ün'eventuela faculted vain surdeda a la Lia Rumauntscha a Cuira culla cundiziun da surlascher quella ad ün'eventuela nouva instituziun rumauntscha in Svizra orientela cun böts similis. Sch'üna tela nu vain fundeda infra 5 ans dvainta la faculted proprietad da la Lia Rumauntscha.

VIII. Disposiziun finela

Art. 22 Ils statüts da l'Uniun Rumauntscha district Sargans e contuorns dals 30 avrigl 1966 sun gnieu revais resguardand l'extensiun dal territori e la müdeda dal nom in «Uniun Rumantscha Rezia Bassa» ed appruvos in occasiun da la radunanza generela dals 18 marz 2018. Els aintran in vigur culla radunanza generela 2018. Revisiun da l'artichel 16 in occasiun da la radunanza generela dals 15-08-2020. Revisiun dals artichels 09 ed 11 in occasiun da la radunanza generela dals 28-08-2021.

Jenins, ils 28-08-2021

Per la suprastanza dall' Uniun Rumantscha Rezia Bassa:

il president: Rinaldo Caduff

l'actuara: Lea Killias